

妙法蓮華經玄義卷第三上

卷五

隋天台智者大師說  
門人灌頂記

二諸境開合者先用十如是爲首何者此經命  
一章絕言稱歎十如今更說五境云何同異耶  
十二因緣與十如<sup>密五</sup>開合者名異故言開義同  
故言合無明支合如是性行支合如是相識  
名色六入觸受合如是體愛合如是緣取合  
如是力作有合如是因生老死合如是果報  
等云又總合者如是相合行有兩支如是性

合無明愛取三支如是體合識名色乃至老  
死七支如是力還是煩惱道三支無明愛取  
能生業力如是作還是行有二支能爲苦作  
業也如是因還是行有二支爲七苦作因也  
如是緣還是無明愛取三支能潤業取苦也  
如是果還是行有之習果也如是報還是行  
有之業招名色等報此兩番通用思議十二  
因緣合六道十如是次用不思議十二因緣  
合四聖十如者無明支轉即變爲明 明即了  
因成聖人如是性惡行支轉即變爲善行善

行即緣因成聖人如是相識名色等苦道轉  
即法身成聖人如是體愛取二支轉成聖人  
菩提心即是如是力有支舍果變成六度行  
即成聖人如是作亦轉成聖人如是因此有  
支轉有二種正道轉成如是因助道轉成聖  
人如是緣老死支轉成法性常住成聖人如  
是果報云又總作者體力作三法祇是煩惱  
業苦變成法身菩提心六度行等勤習三法  
在內成性在外成相正意成體誓願深遠成  
力立行成作牽果成因相助成緣剋發成果

報云若細分四聖節節有異今取大槩故通  
釋耳經云一切智願猶在不失二乘亦得作  
通釋也四種四諦合十如者生滅無生兩種  
苦集是六道十如如是相如是性是集如是  
體是苦知是作力因緣又是集如是果報又  
是苦云生滅無生兩種道滅是析體二乘及  
通菩薩十如如是相性即是道如是體即是  
滅如是力作因緣皆是道如是果報又是滅  
無量無作兩種苦集即是四聖界外果報十  
如集諦即是界外如是相性力作因緣也苦

諦即是界外如是體果報等云無量無作兩種道滅即是四聖界外涅槃十如道諦即是涅槃性相力作因緣等亦是般若解脫也滅諦即是涅槃體果報等亦成常住法身也云四種四諦合四種十二因緣者生滅無生兩苦集即是兩種思議十二因緣生滅無生兩種道滅即是兩種思議十二因緣無明滅乃至老死滅也無量無作兩苦集即是兩不思議十二因緣也無量無作兩道滅即是兩不思議十二因緣無明滅乃至老死滅此可解

七種二諦合十如者藏通別圓入通凡四俗皆是六道十如也藏通兩真是二乘十如也別圓入別兩俗有邊是六道十如無邊是二乘十如圓俗此通九法界十如別入通圓入通別圓入別圓凡五種真皆是佛法界十如也七種二諦合四種十二因緣者藏通別圓入通凡四俗即是思議兩種十二因緣藏通兩真即是思議十二因緣無明滅乃至老死滅也別圓入別兩俗有邊是思議十二因緣無邊是思議無明滅乃至老死滅圓俗即通

界內外四種十二因緣也別入通圓入通別圓入別圓凡五種真即是界外不思議十二因緣無明滅乃至老死滅也七種二諦合四種四諦者實有二諦即生滅四諦也幻有二諦即無生四諦也別入通圓入通兩俗還是無生苦集也別入通真是無量道滅也圓入通真是無作道滅也別俗圓入別俗此是無量苦集圓俗是無作苦集別真是無量道滅圓入別真圓真是無作道滅也五種三諦合十如者別入通圓入通兩俗是六道十如別

俗圓入別俗有邊是六道十如無邊是二乘十如圓俗意通九界云五種真諦皆是二乘菩薩等十如五種中諦皆是佛界十如也五種三諦合四種十二因緣者別入通圓入通兩俗是六道思議十二因緣別圓入別兩俗有邊是思議六道十二因緣生無邊是思議十二因緣滅圓俗義通云今且用是四種十二因緣五種真諦即是思議十二因緣滅亦即是不思議十二因緣生五種中諦即是不思議十二因緣滅五種三諦合四種四諦者

別入圓通兩俗即無生苦集也別俗圓入別俗圓俗通是無生之苦集亦是無生之道滅亦是無量之苦集也別入圓通兩真本取但空邊是無生道滅也別真圓入別真即是無生之道滅於無量是苦集圓真於無生是道滅於無量無作是苦集別入通中是無量道滅圓入通中是無作道滅別中是無量道滅圓入別中是無作道滅圓中正是同五種三諦合七種二諦者簡前兩二諦不被合也次二種二諦二俗即是五種

古五  
三諦家五種俗二真空邊即是五種三諦家真不空邊即是五種三諦家中後三種二諦三俗空邊即是五種三諦家真有邊即是五種三諦家俗三真即是五種三諦家中又作一種說如後簡前二諦不被合後五俗有真

有俗後五真有真有中一實諦合十如者一法界皆具十界簡却九界但與佛法界同也簡三種十二因緣但與一種十二因緣滅同簡三種四諦但與一實四諦同簡七種二諦但與五真諦有同不同簡五種三諦但與

五中諦同云言無諦不可說者合十如如名不異即是空寂言辭相寂滅不可說示即是十種皆如義也諸無明滅乃至老死滅其義甚深甚深即無諦同也生生不可說乃至不生不生不可說即與無諦同也七種真諦皆不可說最初真諦不可說者如身子云吾聞解脫之中無有言說況後六耶非生死非涅槃既非二邊亦無中道即五種中諦與無諦同也一實名虛空虛空無一云何有實即無諦同也無諦自無所存平等大慧無若干也

雖無若干若干無量舒之充滿法界不知從何而來無量無若干收之莫知所有不知從何而去不來不去即是法佛云復次七種二諦赴緣開合轉轉相入一一又各有隨情隨情智隨智等餘五義例亦應有今不具載何者佛以一音演說法衆生隨類各得解自思之間諸境理既融會何意紛葩更相拘入耶答如來觀知十界性相有成熟者未成熟者大機未熟不令起謗小機若熟不令失時隨其所宜應單應複偏圓相入而成熟之間即

得益華嚴雖具鑒十界兩界熟故別圓二種而成熟之三藏亦鑒十界二乘性相熟故用生滅而成熟之方等亦鑒十界四界熟故用四種相入而成熟之般若亦鑒十界亦四界熟故用三種相入而成熟之法華亦鑒十界一性相熟但一圓諦而成熟之若無善巧方便出沒調熟云何境智而得融妙耶譬如畫師尚能淡入五彩作種種像況佛法王於法自在而不能種種間入調伏衆生耶問上明六境等此經聽可無名有其義不答十如名

義已備於前四種十二因緣者化城品明生滅十二緣譬喻品但離虛妄是不生十二緣方便品云佛種從緣起是界外無量無作兩種十二緣四四諦者譬喻品諸苦所因貪欲爲本是生滅四諦藥草喻品了達空法是無生四諦又云無上道及方便品但說無上道如來滅度等是界外無量無作兩種四諦也六十如差別是世諦唯佛與佛乃能究竟盡諸法實相即真諦也安樂行云亦不分別有爲無爲實不實法有是俗諦無是真諦亦不分別

是遮二邊顯中道壽量云非如非異非異非俗非如非真三諦義也方便品云更以異方便助顯第一義是一實諦也又云唯此一事實也若言說無分別法又諸法寂滅相不可以言宣是無諦義也 第二智妙者至理玄微非智莫顯智能知所非境不融境既融妙智亦稱之其猶影響矣故次境說智智即爲二初總論諸智二對境論智總智爲六一數二類三相四照五判六開數者一世智二五停心四念處智三四善根智四四果智五支

佛智六六度智七體法聲聞智八體法支佛智九體法菩薩入真方便智十體法菩薩出假智十一別教十信智十二三十心智十三十地智十四三藏佛智十五通教佛智十六別教佛智十七圓教五品弟子智十八六根清淨智十九初住至等覺智二十妙覺智二卷五類者世智無道邪計妄執心行理外不信不入故爲一五停心四念處已入初賢佛法氣分俱是外凡故爲一四善根同是內凡故爲一四果同見真故爲一支佛別相觀能侵習

故爲一六度緣理智弱緣事智強故爲一通  
教方便聲聞體法智勝故爲一支佛又小勝  
故爲一通教菩薩入真方便智四門偏學故  
爲一通教出假菩薩智正緣俗故爲一別教三  
十信智先知中道勝前劣後故爲一別教三  
十心俱是內凡故爲一十地同是聖智故爲  
一三藏佛是師位名勝三乘弟子故爲一通  
教佛智斷惑照機勝故爲一別教佛智又勝  
故爲一圓教五品弟子同具煩惱性能知如  
來祕密之藏故爲一六根清淨智隣真故爲

一初住至等覺同破無明故爲一妙覺佛智  
無上最尊故爲一如是等隨其類分相似者  
或離或合判爲二十云三辨相者天竺世智  
極至非想此間所宗要在忠孝五行六藝天  
文地理醫方卜相兵法貨法草木千種皆識  
禽獸萬品知名又塗左割右等無憎愛獲根  
本定發五神通停河在耳變釋爲羊納吐風  
雲捫摸日月法是世間法定是不動定慧是  
不動出邀名利增見愛世心所知故名世智  
也五停四念者有定故言停有慧故言觀觀

能翻邪定能制亂數息治散不淨治貪慈治  
瞋因緣治癡念佛治障道念處是觀苦諦上  
四智治於四倒四倒不起由此四觀初翻四  
倒未入聖理故言外凡智也煙法緣四諦境  
生智伏煩惱智更增成十六觀智如火鑽上  
下相依生火燒薪以有智知有境能生煙智  
出五  
令有萎悴如夏時聚華爲積華生煙氣還自  
萎悴又依陰觀陰發智火還燒陰如兩竹相  
摩生火還燒竹林尊者瞿沙說求解脫智火  
燒最在初如火以煙在初爲相無漏智火亦

以煙法在先爲相如日明相在初爲相是故  
名煙於正法毗尼中生信愛敬正法者緣道  
諦信毗尼者緣滅諦信煙能緣四諦云何言  
二答此二最勝應先說又正法是三諦毗尼  
是滅諦如佛爲滿宿我有四句法當爲汝說  
欲知不當恣沒意四句即四諦也所有布施  
持戒盡向解脫是其意趣色界定起是其依  
於自地前生善根是相似因緣於四真諦頂  
是其功用果自地相似後生善根是依果色  
界五陰是其報涅槃決定因及不斷善根是

其利十六行是其行是緣生是修慧色界繫  
三三昧三根隨所說相應衆多心是退煙有  
三種謂下下下中下上頂有三中下中中中  
上忍有二種上下上中世第一有一種謂上  
密五  
上此四善根以三言之煙是下頂是中忍世  
第一是上復有說者煙有二謂下下下中頂  
有三謂下上中下中中忍有三謂中上上下  
上中世第一法有一謂上上亦以三言之煙  
是下下頂是下中忍是中上世第一是上上  
瞿沙云煙有下三頂有六下下乃至中上忍

有八下下乃至上中世第一但上上以三言  
之煙法一種謂下頂法二種謂下中忍有三  
種謂下中上世第一有一種謂上煙有二捨  
一離界地二退時退時捨墮地獄作五無間  
而不斷善根頂亦如是忍唯一捨不墮地獄  
云頂法者色界善根有動不動住不住有難  
不難斷不斷退不退就動乃至退者有二下  
者是煙上是頂彼不動乃至不退者爲二下  
者是忍上者是世第一法復有說者應言下  
頂所以者何在煙法頂故名頂在忍法下故

名下復有說者如山頂之道人不久住若無難必過此到彼若遇難即便退還行者住頂不久若無難必到忍有難退還煙猶如山頂故名頂云何爲觀於佛法僧生下小信小信者此法不久停故言下小此信緣佛生小信是緣道諦緣法生下小信是緣滅諦問應能緣四諦云何言緣二諦答道滅勝故清淨無過是妙是離能生信處爲是受化者信樂心故若世尊說苦集是可信敬者即是受化者此煩惱惡行邪見顛倒云何可敬信我常爲

此逼迫受化者於道滅生欣樂是故說二也復有說者信佛僧是緣道信法是緣三諦則盡信四諦也問住頂亦信陰亦信寶亦信諦何故但說信三寶答三寶是生信敬處但隨行者意於陰生悅適是名爲煙於寶生悅適是名爲頂於諦生悅適是名爲忍問何故頂退不說煙退答頂既退亦應說煙退行者在頂時多煩惱業留難煩惱等作是念若行者到忍我復於誰身中當作果報若離欲界時亦念行者出欲界我復於誰身中生果報離

非想非非想處時亦念行者離彼欲已更不受身我復於誰身中生於果報於此三時多諸留難留難退故大憂惱如人見寶藏大喜欲取即失住頂法者自念不久當得於忍永斷惡道獲大重利猶如聖人而忽退失故大憂惱是故言頂退也若能親近善友從其聞隨順方便法內心正觀信佛菩提信善說法信僧清淨功德是說信寶說色無常乃至說識無常是說信陰知有苦集滅道是說信諦若如是即住頂若不如是即頂退忍法觀者

正觀欲界苦色無色界苦欲界行集色無色界行集欲界行滅色無色界行滅斷欲界行道斷色無色界行道如是三十二心是名下忍行者後時漸漸減損行及緣復更正觀欲界苦色無色界苦乃至觀斷欲界行道除觀斷色無色界行道從是中名中忍復更正觀欲界苦觀色無色界苦乃至觀色無色界行滅除滅一切道復正觀欲界苦色無色界苦乃至觀欲界行滅除色無色界行滅復正觀欲界苦乃至觀色無色界行集除滅一切滅

復正觀欲界苦乃至觀欲界行集除色無色界行集復正觀欲界色無色苦除一切集復正觀欲界苦除色無色界苦復正觀欲界常相續不斷不遠離如是觀時深生厭患復更減損但作二心觀於一行如似苦法忍忍法智如是正觀是名中忍復以一心觀欲界苦是名上忍復次生世第一法世第一法後次生苦法忍譬如人欲從己國適他國多財產不能持去以物易錢猶嫌錢易金嫌金易多價寶往適他國行者乃至漸捨相續不離生

於上忍上忍後生第一法第一法後生苦忍問世第一法有三品不答一人無多人有身子上目連中餘皆下就佛丈佛聲聞爲三品世第一法者此心心數法於餘法爲最爲勝爲長爲尊爲上爲妙亦分亦都分者勝世間法不勝見諦見諦眷屬不相離慧力偏多故熏禪不與凡夫同生一處故盡智時一切善根永離一切諸垢障故三三昧乃至惡賤無漏何況有漏不應都勝分勝彼煙頂忍法亦應言第一應言分勝勝煙頂忍一切凡夫所

得禪無量解脫除入也或言都勝非謂一切事業中勝但以能開聖道門故彼見諦等不能開聖道門以世第一法開聖道門彼見諦等法得修見諦等法得修者皆是世第一法功用是世第一法名義者最勝義是第一義得妙果是第一義如高幢頂更無有上是第一義問前諸義有差別耶答此皆歎說上妙之義亦有差別於不淨安般名最於聞慧名勝於思慧名長於煩爲尊於頂爲上於忍爲妙又依未至爲最依初禪爲勝中間爲長二

禪爲尊三禪爲上四禪爲妙如是種種說此依毗婆沙釋欲委知向彼尋初果八忍八智三果重慮緣真九無礙九解脫智支佛用總相別相如約三世明苦集分別十二因緣即別相相也六度緣理智弱伏而未斷事智強能捨身命財無所遺顧聲聞能發真成聖猶論我衣我鉢互論強弱云通教聲聞總相一門達俗即真通教緣覺能於一門總相別相達俗即真通教菩薩能於四門總相別相達俗即真又能偏四門出假教化衆生十信信

果頭真如實相爲求此理起十信心十住正  
習入空傍習假中十行正習假傍習中十迴  
向正習中初地證中二地已上重慮於中三  
藏佛一時用三十四心八忍八智九無礙九  
唐五解脫斷正習盡通佛坐道場一念相應慧斷  
餘殘習氣別教佛用金剛後心斷一品無明  
究竟盡成佛或言斷時是等覺佛無所斷但  
證得圓滿菩提具足耳圓五品不斷五欲而  
淨諸根具煩惱性能知如來祕密之藏六根  
淨位獲相似中道智初住獲如來一身無量

身入法流海中行任運流注後位可解不復  
記四明智照境者若由智照境由境發智四  
句皆墮性中如別記云若四悉檀因緣立境  
智但有名字云問智能照境境亦能照智不  
答若作不思議釋更互相照義亦無妨仁王  
般若云說智及智處皆名爲般若譬鏡面互  
相照亦如大地一能生種種芽芽亦生地一  
且置斯義世智照六道十如五停心智去至  
體法凡七智照二乘十如六度及通教出假  
菩薩智兩屬上求照菩薩十如下化照六道

十如四十心智亦兩屬上求照菩薩十如下  
化照六道十如十地智兩屬次第照照菩薩  
十如不次第照照佛十如五品去凡四智皆  
照佛界十如總略如此細揀云二十智照四  
種十二因緣境者世智五停四念四果乃至  
文佛六度三藏佛凡七智照思議生滅十二  
因緣境通教三乘入真方便智出假智佛智  
凡五智照思議不生不滅十二因緣境別教  
十信三十心十地佛凡四智照不思議生滅  
十二因緣境其中不無別意且從大判圓教

四智照不思議不生不滅十二因緣境二十  
智照四種四諦者前三藏等七智照生滅四  
諦境次通教五智照無生滅四諦境次別教  
四智照無量四諦境次圓教四智照無作四  
諦境次二十智照二諦者前七智是照析空  
空之二諦次五智是照體空之二諦次八智照  
顯中之二諦其間別圓相入者可以意得云  
次明二十智照三諦者前七智照無中之二  
諦是因緣所生法皆屬俗攝次五智照舍中  
之二諦即空一句皆屬真諦攝也次別圓八

智照顯中之二諦即是假名亦名中道二句皆屬中道諦攝也次二十智照一實諦者此須引釋論明四悉檀皆名爲實世界故實乃至第一義故實當知實語亦通四諦生滅故實無生滅故實無量故實無作故實前三藏

無諦生生不可說故次五智照無生滅之無諦生不生不可說故次四智照無量之無諦不生生不可說故次四智照無作之無諦不生不生不可說故前無諦是權後無諦是實此就言教若就妙悟同於聖人心中所照者則不見有權實故非權非實空拳詎小兒誘度於一切方便說權方便說實會理之時無復權實故稱非權非實爲妙也五明麤妙者十五前十二番智是麤後八番智爲妙何者藏通等佛自是無常亦不說常彼二乘菩薩何得

聞常信常修常是故爲麤別教十信初已聞常信修於常尚勝彼佛何況餘耶是故爲妙常途云法華不明常者祇是三藏意耳今明十信知中已過半尼則八番爲妙也又別教四智三麤一妙圓教四智悉皆稱妙何者地人云中道乃是果頭能顯初心學者仰信此理如藕絲懸山故說信行皆非圓意也故十信智爲麤十住正修空傍修假中十行正修假傍修中十迴向始正修中此中但理不具諸法是故皆麤登地智破無明見中道證則

爲妙類如通藏兩種俱得道而三藏門拙今別教亦爾教門皆權而證是妙云圓教四智皆妙者如法相說如說而信如理而行始論五品終竟妙覺實而非權是故皆妙是名待麤智說妙智也又約知見明麤妙者知與見云何然分別有四不知不見知非見見非知亦知亦見先約三藏釋後約圓釋中間例可解凡夫不聞故不知不證故不見五停四念至世第一法聞故名知未證故非見辟支佛不聞故非知自然證故是見四果聞故亦是

知證故亦是見傳傳判麤妙可解約圓教釋者七方便不聞故不知未證故不見五品六根聞故知未證故不見發宿習者名見不從聞故不知稟教證入者亦知亦見此節節傳爲麤妙究竟而論前來二十種智略而言之

不出權實二智如經如來方便知見波羅蜜皆悉具足即總束得前來諸權智也如來知見廣大深遠即是總束前來實智也方便既其具足何所不該知見既其廣大深遠何所不攝境淵無邊智水莫測唯佛與佛乃能究

蓋如此知見即是眼智眼即五眼具足智即三智一心一切種智知於實兩智知於權佛眼見於實四眼見於權此知即是見此見即是知對前諸智諸智是麤此之知見名之爲妙也若得知見中意不復論五眼迷者未了更約眼明麤妙如肉眼盲閉何由見色徒聞人說起種種想終非真見欲令眼開應須治膜那得閉眼執諍何益耶閉眼想則麤眼開見則妙天眼未開不見障外爲麤修禪定願智之力能發得淨色徹障內外明闇無隔慧

眼未開常行死逕假令情想亦復非實故爲  
麤無漏豁發故稱爲妙諦理明了故稱妙法  
眼未開差機說法如身子僻教滿願穢器名  
爲麤破障通無知分別藥病名之爲妙佛眼  
不開不見實相故文云二乘之人及新發心  
卷五  
者不退菩薩所不能知故四眼皆麤除諸菩  
薩衆信力堅固者以信得入相似佛眼能開  
眞佛知見乃名爲妙諸教多說四眼或帶四  
眼說佛眼是故爲麤今經獨說佛眼是故爲  
妙是爲待麤爲妙也六明開麤顯妙者前十

六番智若不決了但是麤智若得決了悉成  
妙智何者如妙莊嚴王先是外道世智聞法  
華經便得決了以邪相入正相於諸見不動  
而修三十七品不捨八邪而入八正即是決  
於世智得入妙智或與五品齊或與相似齊  
或與分得齊節節有入義細作云若五停方  
便智乃至通教佛等智若不決了即是麤智  
今開權顯實汝等所行是菩薩道來入妙位  
須一一將十二番智來入圓妙四智或入五  
品相似分得等智云又決了別教歷別之智

入於妙智當體即是某位進入是某位細揀  
云十六魔智皆成妙智無魔可待即是絕待  
智妙也復次開魔眼爲妙眼者餘經雖說爲  
五眼五眼不融是故爲魔今經決了四眼令  
入佛眼文云父母所生眼遂得清淨學大乘  
者雖有肉眼名爲佛眼即是決了肉眼名爲  
佛眼也淨名云世孰有真天眼者有佛世尊  
不以二相見諸佛國此即是決了天眼即是  
佛眼也願得如世尊慧眼第一淨即是決了  
慧眼能得入妙決法眼入妙者邊際智滿是

也四眼融入佛眼寂而常照故文云決了聲  
聞法是諸經之王五眼具足成菩提開佛知  
見故稱爲妙問佛眼開乃名爲妙六根雖淨  
云何爲妙答佛眼雖未開已能圓學圓信如  
迦陵頻伽鳥雖在穀中音聲已勝諸鳥即是  
假名相似等妙若開即是分妙究竟妙云五二  
對境明智又二一對五境二展轉相照對境  
初應對十如境此旣一經之意處處說之可  
解故不復釋次對四種十二因緣明智者大  
經云十二因緣有四種觀下智觀故得聲聞

菩提中智觀故得緣覺。允菩提上智觀故得菩薩。菩提上上智觀故得佛。菩提何者十二因緣本是一境。緣解不同。開成四種。今以四教意釋之。三藏具有三人。而皆以析智觀界內十二因緣事爲初門。然析智淺弱三人之中聲聞最劣。以劣人標淺法。故名下智通教。亦有三人同以體智觀界內十二因緣理體法。雖深望藏爲巧。望別未巧。三人之中緣覺是中以中人名通法。故言中智別教。佛與菩薩俱知界外十二因緣事。次第菩薩比佛猶未

是上比於通藏。則是上法。故以上智當名也。圓教佛與菩薩俱觀界外十二因緣理初心即事而中此法最勝。故以佛當若。故言上上智觀也。以四教釋四觀於義允合。云所言下智觀者。觀受由觸觸由入入由名色名色由識識由行行由無明無明顛倒不善思惟致不善行感四趣識名色等。若善思惟致善行感。人天識名色等。觀此無明念念無常前後不住。所生善惡遷變速朽。所受名色衰損代謝煩惱業苦。更互因緣都無暫停過去二因

卷五

十九

現在五果現在三因未來二果三世迴復猶若車輪癡惑之本既無常苦空無我則無明滅無明滅故諸行滅乃至老死滅若不然火是則無煙是名子縛斷無子則無果滅智灰身離二十五有是名果縛斷則是下智觀十二因緣得聲聞菩提也中智者觀受由觸乃至行由無明無明祇是一念癡心心無形質但有名字內外中間求字不得是字不住亦不不住猶如幻化虛誑眼目無明體相本自不有妄想因緣和合而生無所有故假名無

明不善思惟心行所造以不達無明如幻化故起善不善思惟則有善不善行受善不善名色觸受今達無明如幻故則諸行亦如幻從幻生識名色等皆如幻愛取有生三世輪轉幻化遷改都無真實有智之人不應於中而生愛恚無明既不可得則無明不生不生則不滅諸行老死亦不生不滅不生故則非新不滅故則非故非故者無故可畢非新者無新可造無新者子縛斷無故者果縛斷是名中智觀十二因緣得緣覺菩提上智觀者

觀受由觸乃至行由無明無明祇是癡一念  
心心癡故派出煩惱由煩惱派出諸業由業  
派出諸苦觀此煩惱種別不同不同故業不  
同業不同故苦不同諸行若干名色各異種  
出五  
種三道無量無邊分別不濫知因此煩惱起  
此業得此苦不關彼業及彼煩惱如是三道  
二十  
覆障三德破障方便亦復無量無明若破顯  
出般若業破顯出解脫識名色破顯出法身  
愛取有老死亦復如是自既解已復能化他  
於一切種知一切法起道種智導利衆生是

名上智觀十二因緣也上上智觀者觀受由  
觸乃至行由無明知十二支三道即是三德  
豈可斷破三德更求三德則壞諸法相煩惱  
道即般若當知煩惱不闇般若即煩惱般若  
不明煩惱既不闇何須更斷般若不明何所  
能破闍本非闍不須於明如耆婆執毒成藥  
豈可捨此取彼業道即是解脫者當知業道  
非縛解脫即業者脫非自在業非縛故何所  
可離脫非自在何所可得如神通人豈避此  
就彼耶苦道即法身者當知苦非生死法身

即生死法身非樂苦非生死何所可憂法身  
非樂何所可喜如彼虛空無得無失不忻不  
戚如是觀者三道不異三德三德不異三道  
亦於三道具一切佛法何者三道即三德三  
卷五德是大涅槃名祕密藏此即具佛果深觀十

二因緣即是坐道場此即具佛因佛因佛果  
皆悉具足餘例可知是名上上智觀十二因  
緣得佛菩提約此應判麤妙開麤顯妙意可  
解故不委記耳又四智照四境境若不轉其  
智則麤四境轉成妙境麤智即成妙智仍是

待絕之意云二對四種四諦明智者大經云  
知聖諦智則有二種中智上智中智者聲聞  
緣覺上智者諸佛菩薩若依此文束於體析  
合稱爲中束大乘利鈍合稱爲上今若約根  
緣利鈍內外事理開即成四聲聞根鈍緣四  
諦事即生滅四諦智緣覺根利緣四諦理即  
無生四諦智菩薩智淺緣不思議事即無量  
四諦智諸佛智深緣不思議理即無作四諦  
智也此乃大經之一文又云凡夫有苦無諦  
聲聞有苦有苦諦凡夫不見苦理故言無諦

聲聞能見無常苦空故言有諦即是生滅四  
諦智也又云菩薩之人解苦無苦而有真諦  
即是體苦非苦故言無苦即事而真故言有  
諦乃是摩訶衍門無生四諦智也又云知諸  
陰是苦知諸入爲門亦名爲苦知諸界爲分  
亦名爲性亦名爲知是名中智依前說者即  
屬聲聞也分別諸苦諸入界等有無量相我  
於彼經竟不說之是名上智受想行識亦復  
如是非諸聲聞緣覺境界此則異前兩意既  
稱上智又非二乘境界豈非別教菩薩觀恒

沙佛法如來藏理耶是爲無量四諦智又云  
如來非苦非集非滅非道非諦是實虛空非  
苦非諦是實非苦者非虛妄生死非諦者非  
二乘涅槃是實者即是實相中道佛性也又  
云有苦有苦因有苦盡有苦對如來非苦乃  
至非對是故爲實如此明義既異上三番豈  
非無作四諦智耶例此一諦爲四餘三亦應  
爾謂有集有集果有集盡有集對有盡有盡  
因有盡障有盡障相有對有對果有對障有  
對障相如來非此四四十六種但是於實云

如是等智觀於四諦。諦既未融智。諦皆虛無。獨有非苦。非對有實爲妙。若諦圓智亦隨圓。皆是如來非苦。非諦是實之妙智也。此即待絕。

兩意  
云

妙法蓮華經玄義卷第三上

音釋

槩	居代切	大率也	葩	拔已切	摸	謨奔切	糲	子
萎	聚也	華貌						
悴	危也	秦醉切						
嫌	枯悴也	胡兼切						
穢	憎也	雙智						
派	普	八卦						
分								

妙法蓮華經玄義卷第三下

密六

隋天台智者大師說  
門人灌頂記

三對二諦境明智者權實二智也上真俗二  
諦旣開七種今權實二智亦爲七番內外相  
即不相即四也三相接合七也若對上數之  
析法權實二智體法舍中二智體  
法顯中二智別二智別舍圓二智圓二智上  
七番各開隨情隨情智隨智合二十一種諦  
今七番二智亦各開三種謂化他權實自行

化他權實自行權實合二十一權實也若析  
法權實二智者照森羅分別爲權智盡森羅  
分別爲實智說此二智逗種種緣作種種說  
隨種種欲種種宜種種治種種悟名隨堪任  
當緣分別雖復種種悉爲析法權實所攝故  
有化他二智化他二智隨緣之說皆束爲權  
智若內自證得若權若實俱是實證束爲實  
智內外相望共爲二智故有自行化他權實  
二智也就自證權實唯獨明了餘人不見更  
判權實故有自行二智也今更約三藏重分

別之此佛化二乘人多用化他實智二乘稟此化他之實修成自行之實故佛印迦葉云我之與汝俱坐解脫牀即此義也若化菩薩多用化他權智其稟化他之權修學得成自行之權佛亦印言我亦如汝云此三種二智若望體法二智悉皆是權故龍樹破云豈有不淨心中修菩提道猶如毒器不任云食食則殺人此正破析法意也故皆是權云體法權實二智者體森羅之色即是於空即色是權智即空是實智大品云即色是空非色滅

空正是此義爲緣說二緣別不同說亦種種雖復異說悉爲化他權實所攝故有化他二智化他二智既是隨情皆束爲權內證權實既自證悉名爲實以自之實對他之權故有自行化他二智也就自證得又分權實故有自行二智也此三二智望舍中二智復皆名權何者無中道故云體法舍中權實二智者體色即空不空照色是權智空不空是實智說此二智赴無量緣隨情異說雖復無量悉是舍中二智所攝故有化他二智化他二

智本是逗機皆名爲權自證二智皆名爲實於自證二智更分權實故有自行二智此三二智望顯中二智悉皆是權何者帶於空真及教道方便故又體法顯中權實二智者體色即空不空一切法趣空不空了色是權智

空不空一切法趣空不空是實智爲緣說二緣既無量說亦無量無量之說悉爲顯中二智所攝故有化他二智化他二智悉是爲緣皆名爲權自證二智既是證得悉名爲實以自對他故有自他二智就自證權實自分二智故有自行二智此三二智望別舍圓二智悉復是權何者以次第故帶教道故別舍圓權實二智者色空不空一切法趣

不空色空名權智一切法趣不空爲實智以  
此二智隨百千緣種種分別分別雖多悉爲  
別舍圓二智所攝故有化他二智化他二智  
既是爲緣悉皆是權自證二智既是證得悉  
名爲實自他相望共爲二智就自證得更分  
權實故有自行二智此三二智望圓二智悉  
復是權何者帶次第及教道故圓權實二智  
者即色是空不空一切法趣色趣空趣不空  
一切法趣色趣空是權智一切法趣不空是  
實智如此實智即是權智權智即實智無二

無別爲化衆生種種隨緣隨欲隨宜隨治隨  
悟雖種種說悉爲圓二智所攝故有化他二  
智化他二智既是隨情悉復是權自證二智  
悉名爲實就自證中更分二智故有三種不  
同也此之二智不帶析法等十八種二智方  
便唯有真權真實名佛權實如經如來知見  
廣大深遠方便波羅蜜皆悉具足獨稱爲妙  
待前爲麤又從析法二智至顯中二智凡十  
二種二智待前皆名爲麤顯中爲妙何以故  
此妙不異後妙故又從次第二智凡九種二

智待前爲麤不次第爲妙又前十八種二智皆麤唯不次第三種爲妙又不次第二種爲麤一種爲妙又歷五味教者乳教具三種九種二智酪教一種三種二智生酥四種十二種二智熟酥具三種九種二智此經但二種

卷六  
三種二智若酪教中權實皆麤醍醐教中權實皆妙餘三味中權實有麤有妙可以意推若不作如上釋諸智者經論異說意則難解何者華嚴解初住心云三世諸佛不知初住智世人釋云如實智佛自不知佛如實智亦

不知初住如實智此釋自謂於理爲通其實不允若藏通等佛不論如實智云何於自如實智不知耶別教初住不得如實智云何言不知若得前來諸智意者三世三藏佛不知圓教初住智此則事理二釋俱無滯也此中義兼二種一分別二十一種權實二待麤論妙如上說若開麤顯妙者諸方便諦旣融成妙諦對諦立智悉非復麤如賤人舍王若過者舍則莊嚴如衆流入海同一鹹味開諸麤智即是妙智也二智多有所關須商略類通

今對七種二諦明二十一種權實以爲章門  
若得此意約因緣境亦應如此謂析因緣智  
體因緣智舍中因緣智顯中因緣智次第因  
緣智帶次第因緣智不次第因緣智一一各  
有化他自行化他自行等三種分別合有二  
十一種分別麤妙判五味多少論待絕等四  
諦三諦一諦等亦應如是當自思之何煩具  
卷六 王

是義故隨情則多智見於理理唯一種不得  
有異云夫二諦差別已如上說說此七權實  
二十一權實頗用世人所執義不頗同世人  
所說語不頗用諸論所立義不既不從世人  
亦不從文疏特是推大小乘經作此釋耳若  
破若立皆是法華之意若巧拙相形以通經  
二智破三藏經二智乃至次第不次第相形  
以圓經二智破別經二智方便諸經明智既  
麤通經之論豈得爲妙經論既爾弘經論人  
何勞擊射任其所說自有所墮若作生滅解

權實者墮在初番若作不生不滅解者墮第二番乃至第七番亦可知又縱廣引經論莊嚴已義者亦不得出初番隨情二諦化他權實況出初番第二第三權實尚不出初番三種權實況第七番三種權實若但以初番二智破一切世間情執略盡假令得入化城祇是自行實智尚不得化他之權何況能得後番諸智若尋二十一種二智凡破幾外見凡破幾權經論復顯幾是立幾權經論然後方稱妙權妙實世人全不識一兩種權實之意

而情中即計爲智若是智者破何惑見何理未見理未破惑生死浩然非情何謂今若待前諸麤智而明妙智者法華破待之意也若其會者一切權經論所明諦理皆成妙理無非智地會一切權經論所明二智無非妙智悉是大車如此破會深廣莫以中論相比可熟思之云四對三諦明智者上明五三諦竟今更分別夫三智照十法界束十爲三謂有漏無漏非有漏非無漏三法相入分別有五初謂非漏非無漏入無漏對漏無漏爲三法

二謂一切法入無漏對漏無漏爲三法三謂漏無漏非漏非無漏爲三法四謂一切法趣非漏非無漏對漏無漏爲三法五謂一切法趣漏趣無漏趣非漏非無漏爲三法更說五境竟對此五境明五三智者謂一切智道種智一切種智三智相入五種不同一中智入空智對道智爲三次如來藏智入空智對道智爲三次中智對兩爲三智次如來藏智入中智對兩智爲三智次圓三智是爲五差中智入空智分別爲三智者初依無漏發一切

智次依有漏發道種智後深觀無漏之空知空亦空發一切種智然初心不知空空次雖得空亦不空空後能深觀於空空於前空但二空名同二境亦合故言相入今若分別以無漏空爲一切智有漏空爲道種智中道空爲一切種智世人採經論意云六地斷惑與羅漢齊七地修方便道八地道觀雙流破無明成佛即此意也如來藏智入空智分別三智者依漏無漏發一切智道種智不異前而後不因別境更修中智但深觀空能見不空空六

不空即如來藏藏與空合故言相入以深觀  
空見不空故發一切種智前中道智但顯別  
理理之與智不具諸法藏理藏智具一切法  
故異於前以藏智對兩智爲三智也大經云  
聲聞之人但見於空不見不空智者見空及  
與不空大品云一切智是聲聞智道種智是  
菩薩智一切種智是佛智即此意也中智對  
兩成三智者各緣一境各發一智次第深淺  
不相濫入故地持云種性菩薩發心欲除二  
障有佛無佛決定能次第斷諸煩惱即此意

也如來藏智入中智爲三智者兩智不異前  
一切種智小異何者前明中境直中理而已  
欲顯此理應修萬行顯理之智故名一切種  
智耳今如來藏理舍一切法非直顯理之智  
名一切種智與前爲異用此智對前爲三智  
也故地論師云緣修顯真修真修發時不須  
緣修前兩智即是緣修後智發時即是真修  
真修具一切法不須餘也即是此義云圓三  
智者有漏即是因緣生法即空即假即中無  
漏亦即假即中非漏非無漏亦即空即假一

法即三法三法即一法一智即三智三智即一智智即是境境即是智融通無礙如此三智豈同於前釋論云三智一心中得無前無後爲向人說令易解故作三智名說耳即是此意云六若欲顯智要須觀成況論觀智俱通因果別則觀因智果例如佛性通於因果別則因名佛性果名涅槃今就別義以觀爲因成於智果如瓔珞云從假入空名二諦觀從空入假名平等觀二觀爲方便道得入中道第一義諦觀今用從假入空觀爲因得成於

果名一切智用從空入假觀爲因得成道種智果用中觀爲因得成一切種智果也上明於智略有五種今以觀成亦應五種細作可知修觀義如止觀云言麤妙者藏通兩佛雖有一切種智之名更無別理不破別惑此智不成故不用也中入空智者雖說中道因於通門而成兩智後照中道無廣大用因於拙教果又不融是故爲麤次如來藏入空智者教果理雖融因是通門亦名爲麤中對二智者雖不因通而三智別異果教未融是故爲

鹿  
如來藏入中者在果雖融因是別門此因亦鹿圓三智者因圓果圓因妙果妙諦妙智妙正直捨方便但說無上道是故爲妙智也若歷五味教者乳教有三種三智酪教一種三智生酥具五種三智熟酥亦具五種三智麤妙可知法華卷六但一種三智此是法華破意即相待妙也開麤明妙者世智無道法尚以邪相入正相治生產業皆與實相不相違背低頭舉手開麤顯妙悉成佛道何況三乘出世之智故大經云聲聞緣覺亦實亦虛斷煩惱故名之爲實非常住故名之爲虛凡夫未斷煩惱無實唯虛尚開麤入妙即是大乘何況二乘之智二乘之智根敗心死尚得還生何況道種之智如此開時一切都妙無非實相七寶大車其數無量此是法華會意即絕待妙也五對一諦明智者即是如實智也釋論云諸水入海同一鹹味諸智入如實智失本名字故知如實智總攝一切智純照一境故總衆水俱成一鹹也若待十智爲麤如實智爲妙若待諸實智諸實智名麤中道如實

智名妙若開麤顯妙者非但諸實智爲妙十  
智亦名妙云無諦無說者旣言無諦亦復無  
智若歷諸處明無諦者餘方便無諦無智爲  
麤中道無諦無智爲妙若以杜口絕言無諦  
無智者亦無麤無妙無待無絕歷一切法皆  
無麤無妙也二展轉相照者六番之智傳照  
前諸境思議因緣下智中智照六道十如性  
相等下中二智觀十二因緣滅者照二乘十  
如性相等上智照菩薩性相本末等上上智  
照佛法界性相本末等四種四諦智照十法

界者生滅無生等苦集智照六道十如相性  
生滅無生道滅智即是照二乘十如相性無  
量無作苦集智照菩薩界性相等無量無作  
道滅智照佛法界相性本末等四種四諦智  
照四十二因緣者生滅無生苦集智照思議  
兩十二因緣音六也生滅無生滅兩道滅智是照  
兩思議十二因緣滅也無量無作兩苦集智  
照不思議兩十二因緣也無量無作道滅智  
照不思議兩十二因緣滅也七種二智照十  
法界者生滅無生滅兩權智及入通等二合

四權智照六道性相生滅無生滅兩實智照  
二乘性相等別權圓入別權有邊是照六道  
性相無邊是照二乘性相圓權則通照九界  
性相別入通實空邊是二乘性相不空邊是  
菩薩性相圓入通實空邊是二乘性相不空  
邊是照佛界相性別實是照菩薩性相圓入  
別實圓實俱照佛法界相性也七種二智照  
四種因緣者前四權是照思議兩十二緣別  
權圓入別權有邊是照兩思議十二緣無邊  
是照兩十二緣滅圓權則通云<sub>上</sub>別入通實空

邊是照思議十二緣滅不空邊是照不思議  
十二緣圓入通實空邊同上不空邊是照不  
思議十二緣滅別實照不思議兩十二緣滅  
圓實照而不思議十二緣滅等前四種權智  
是照生滅無生滅兩苦集又三權智照無量  
無作苦集二實智是照思議兩道滅又五實  
智是照不思議兩道滅五種三智照十法界  
卷六  
者五種道種智照六道性相本末等五種一  
切智照二乘菩薩性相本末等五種一切種  
智照佛法界十如相性等又五種三智照四

種十二因緣者五種有智照思議兩十二緣五種一切智照兩思議十二緣滅又是照不思議十二緣五一一切種智是照兩不思議十二緣滅五種三智照四種四諦者五道種智照生滅無生兩苦集五種一切智照生滅無生兩道滅亦是照無量無作兩苦集五種一切種智是照無量無作兩道滅五種三智照七種二諦者五道種智是照四種俗諦五種一切智是照兩種真諦亦是照別圓入別圓三種俗諦五種一切種智是照五種真諦一

如實智是照佛界十如性相又是照不思議十二因緣又是照無作四諦又是照五種真諦又是照五種中道第一義諦無諦無說與十相性如合與不思議十二緣滅合與四種不生不生合與真諦無言說合與中道非生死非涅槃合如此等諸智傳傳照諦諦若融智即融智諦融名之爲妙如此等皆是方便說言稱妙不妙見理之時無復權實非權非實亦無妙與不妙是故稱妙也七種二諦五種三諦更相間入餘諸境亦有此意七種二

智五種三智既相間入者餘諸智亦有此意  
例自可作云 第三行妙者爲二一通途增  
數行二約教增數行夫行名進趣非智不前  
智解導行非境不正智目行足到清涼池而  
解是行本行能成智故行滿而智圓智能顯  
宗六十三  
理窮則智息如此相須者則非妙行妙行  
者一行一切行如經本從無數佛具足行諸  
道又云無量諸佛所而行深妙道又云盡行  
諸佛所有道法既具復深又盡具即是廣深  
即是高盡即究竟此之妙行與前境智一而

論三三而論一前境說如法相法相亦具三  
名秘密藏前智是如法相解解亦具三如而  
上三目今行是所行如所說行亦具三名伊  
字三點若三若一皆無缺滅故稱妙行耳前  
對境明智今亦應對智明行若直對一種智  
增數明行則行若塵沙說不可盡況對諸智  
各導衆行則浩若虛空得意止言不復可說  
釋論云菩薩行般若時以一法爲行攝一切  
行或無量一法爲行攝一切行或二法爲行  
攝一切行或無量二法爲行攝一切行乃至

十法百法千萬億法爲行攝一切行或無量  
十法百千萬億法爲行攝一切行行雖衆多  
以智爲本智如導主行若商人智如利針行  
如長線智御行牛車則安隱能有所至用此  
增數諸行爲前十如諦智所導乃至一實諦  
卷六  
智所導若得此意以正智導衆行入正境中  
此義唯可懸知不可載記云二約教增數者  
若三藏增數明行如阿舍中佛告比丘當修  
一行我證汝等四沙門果謂心不放逸若能  
護心不放逸行廣演廣布則所作已辦能得

涅槃又告比丘當修一行謂他物莫取比丘  
白佛我已知已佛言汝云何知比丘白佛他  
物謂色聲香味觸法佛言善哉若能不取此  
六即所作已辦能得涅槃所言廣演廣布者  
以不放逸心歷一切法謂三界六塵皆不放  
逸得至涅槃增二數明行者阿舍云阿練若  
比丘當修二法爲行謂修止修觀若修止時  
即能休息諸惡戒律威儀諸行禁戒悉皆不  
失成諸功德若修觀時即能觀苦如實知之  
觀苦集苦盡苦出要如實知之得盡漏不受

後有怛薩阿竭亦如是修增三數明行者謂戒定慧此三是出世梯陞佛法軌儀戒經云諸惡莫作諸善奉行自淨其意是諸佛教諸惡即七支過罪輕重非違五部律廣明其相如是等惡戒所防止諸善者善三業若散若

靜前後方便支林功德悉是清外故稱爲善自淨其意者即是破諸邪倒了知世間出世間因果正助法門能消除心垢淨諸瑕穢豈過於慧佛法曠海此三攝盡若得此意四五六七乃至百千萬億法爲行攝一切行亦如

是是名下智導行也通教增數行者不定部帙判通教但取三乘共學法門指此爲通耳今且引釋論增數以示其相論云菩薩行般若時雖知諸法一相亦能知一切法種種相雖知諸法種種相亦能知一切法一相云何觀一切法一相所謂觀一切法無相如四大各各不相離地中水火風但地多以地爲名水火風亦如是今觀無此異相若火中三大三大應併熱若三大在火中三大遂不熱則不名火若三大併熱則三大捨自性皆

名爲火無復三大若言有三大而細不可知此與無何異若麤可得則知有細若無麤細亦無如是則火中諸相不可得一切法相亦不可得是故一切法皆一相此以一相破異相復以無相破一相無相亦自滅如前火木然諸薪已亦復自燒是爲觀一切法一相一相無相如是無量一切法悉皆一相一相無相或二法爲行攝一切行乃至百法千萬億法爲行攝一切行可以意推不復繫記別敎增數行者如善財入法界中說於一善知識

所各聞一法爲行或如幻三昧或投巖赴火筭砂相鑿發菩提心等種種一行皆云佛法如海我唯知此一法門餘非所知乃至一百一十善知識一一法門皆如是是一行皆破無明入深境界若二法三法百千萬億等法亦應如是云圓敎增數行者如文殊問經明菩薩修一行三昧當於靜室結跏趺坐繫緣法界一念法界一切無明顛倒永寂如空留大比之一行即是一切無礙人一道出生死一切諸法中皆以等觀入解慧心寂然三界無

倫匹此乃一行攝一切行增二法爲行攝一切行所謂止觀增三法爲行攝一切行謂聞思修戒定慧增四法爲行攝一切行謂四念處增五法爲行攝一切行謂五門禪增六法爲行攝一切行謂六波羅密增七法爲行攝一切行謂七善法增八法爲行攝一切行謂八正道增九法爲行攝一切行謂九種大禪增十數爲行攝一切行謂十境界或十觀成乘等增百數千萬億數阿僧祇不可說法門爲行竝可具載若得其意例可解然增數明

行爲行不同須判麤妙若三藏增數諸行以生滅智導但期出苦止息化城是故爲麤通教增數諸行體智雖巧但導出苦灰斷是同別教增數諸行智導則遠自淺階深而諸行隔別事理不融是故爲麤圓教增數諸行行融智圓是故爲妙今經屬圓增數如觀經云於三七日一心精進此就一法論行妙若行若坐思惟此經此就二法論行妙若聞是經思惟修習善行菩薩道此就三法論行妙四安樂行此就四法論行妙五品弟子此就五

法論行妙六根清淨此就六法論行妙如是等往<sub>處處</sub>論妙也開龐論妙者低頭舉手積土弄砂皆成佛道雖說種種法其實爲一乘諸行皆妙無纏可待待即絕矣復次約五數明行妙者又爲二先明別五行次明圓五行別

卷六  
第十六

者如涅槃云五種之行謂聖行梵行天行嬰兒行病行聖行有三戒定慧如經菩薩若聞大涅槃聞已生信作是思惟諸佛世尊有無上道有大正法大衆正行從此立行若聞大涅槃即是信果亦是信滅有無上道已去是

信顯果之行無上道是信慧有大正法是信定大衆正行是信戒是名信因信道自傷已身及諸衆生破戒造罪失人天樂及涅槃樂即是知集住來生死受惡道報即是知苦苦集與戒定慧相違即無道無道故不得涅槃則無滅菩薩欲拔苦集而起大悲興兩誓願欲與道滅而起大慈興兩誓願發誓願已次則修行思惟在家逼迫猶如牢獄不得盡壽淨修梵行出家閑曠猶若虛空即棄家捨欲白四羯磨持性重戒息世譏嫌等無差別不

爲愛見羅刹毀戒浮囊如止觀中說因是持戒具足根本衆清淨戒前後眷屬餘清淨戒非諸惡覺覺清淨戒護持正念念清淨戒迴向具足無上道戒根本者十善性戒衆戒根本爲無漏心持故言清淨前後眷屬餘清淨

十六

十七

戒者偷蘭遮等是前眷屬十三等是後眷屬餘者非律藏所出絃諸經所制者如方等二十四戒之流名爲餘戒也此兩支屬律儀作法受得之戒也後三支非作法是得法得法時乃發斯戒也非諸惡覺覺清淨戒者即定

共也尸羅不清淨三昧不現前以戒淨故事障除發得未來性障除發得根本滅惡覺觀名定共戒也護持正念念清淨戒者即四念處觀理正念雖未發真由相似念能發真道成道共戒故名正念念清淨戒復次定共戒依定心發屬止善義道共戒依分別心發屬行善義動不動俱是毗尼何者戒論防止得定共心不復起惡得道共發真求無過罪故俱是戒也回向具足無上道戒者即是菩薩於諸戒中具四弘六度發願要心回向菩提

故名大乘戒弘誓如前說六度者欲惡出家捨於所愛即是檀纖毫不犯拒逆羅刹即是尸能捨節身心安忍打罵名生忍耐八風寒熱貪恚等名法忍愛見不能損即是羼提守護於戒犯心不起即是精進決志持戒不爲狐疑所誑專心不動名爲禪明識因果知戒是正順解脫之本出生一切三乘聖人非六十二見雞狗等戒名爲般若又別發願要制已心寧以此身卧於熱鐵不以破戒受他牀席十二誓願自制其心又更發願願一切衆

生得護持禁戒得清淨戒善戒不缺戒不析戒大乘戒不退戒隨順戒畢竟戒具足諸波羅蜜戒以此十願防護衆生菩薩一持戒心若干願行以莊嚴戒諸餘行心亦應如是然護他十戒從自行五支中出從根本眷屬兩支出禁戒清淨戒善戒何者篇聚作法即是禁戒禁戒若發無作乃名清淨清淨即止善而言善戒即是行善也從非惡覺覺清淨戒開出不缺戒何者雖防護七支妄念數起致有缺漏若發未來禪事行不缺得根本禪性

行不缺從護持正念念清淨戒開出不析戒  
即道共戒也滅色入空是析法道共今體法  
入空故名不析又內有道共則戒品牢固不  
可破析也從回向具足無上道戒開出六乘  
不退隨順畢竟具足波羅密戒言大乘者菩  
薩持性重譏嫌等無差別自求佛道性重則  
急爲化衆生譏嫌則急小乘自調性重則急  
不度他故譏嫌則寬菩薩具持兩種故名大  
乘戒不退者行於非道善巧方便婬舍酒家  
非法之處輒以度人而於禁戒無有退失如

醫療病不爲病所汙故名不退隨順者隨物  
機宜隨順道理故名隨順戒畢竟者豎究竟  
無上之法也具足波羅密者橫一切圓滿無  
法不備也大論亦明十種戒不破不缺不穿  
不雜四種即是大經根本支中禁戒清淨戒  
善戒不缺戒論隨道戒即是大經護持正念  
支中不析戒也論無著戒即是大經回向支  
中不退戒論智所讚戒即是大經大乘戒論  
自在戒即是大經自在戒論隨定戒即是大  
經隨順戒論具足戒即是大經波羅密戒大

經明畢竟論言隨定此大同小異於義無失  
涅槃欲辨菩薩次第聖行故具列諸戒淺深  
始終具足善能護持即入初不動地不動不  
退不墮不散是名戒聖行戒聖行既從始淺  
以至於深今仍判其龐妙禁淨善三戒屬律  
儀律儀通攝衆故定尊卑位次雖有菩薩  
佛等不別立衆故戒法是同但以佛菩提心  
爲異耳故知律儀等三戒三藏攝不缺是定  
共根本禪是事亦屬三藏攝是故爲麤不析  
戒是體法道共即通教攝大乘不退等別教

攝亦兼於通通有出假隨機順理於道不退  
然依真諦不及別人別人爲妙也隨順畢竟  
具足等圓教攝不起滅定現諸威儀不捨道  
法現凡夫事故名隨順唯佛一人具淨戒餘  
人皆名汙戒者故名畢竟戒戒是法界具一  
切佛法衆生法到戶彼岸故名具足波羅密  
戒淨名云其能如是是名奉律是名善解此  
經云我等長夜持佛淨戒法王法中久修梵  
行始於今日得其果報又羅睺羅密行唯我  
能知之豈非待前諸戒皆麤唯圓爲妙也復

次持初戒如乳中間如三味後戒如醍醐醍醐爲妙云開麤顯妙者他云梵網是菩薩戒今問是何等菩薩戒彼若答言是藏通等菩薩戒者應別有菩薩衆衆既不別戒何得異又若別明菩薩戒何等別是緣覺戒今明三

藏三乘無別衆不得別有菩薩緣覺之戒也

若作別圓菩薩解者可然何者三乘共衆外別有菩薩故別有戒問三乘衆外別有菩薩戒者緣覺戒云何答三乘衆外無別緣覺此說猶是待麤之戒耳開麤者毗尼學者即大

乘學式又式又即是大乘第一義光非青非黃非赤白三歸五戒十善二百五十皆是摩訶衍豈有麤戒隔於妙戒戒既即妙人亦復然汝實我子即此義也是名絕待妙戒妙法蓮華經玄義卷第三下

音釋

梯陞梯天黎切木階也階於琰切屢於黑子也絺古費  
胃切也羣梵語也此云忍療力照切緒切也呂象

永樂北藏

妙法蓮華經玄義

第一五七冊